

# **UOLI VOLOXU TAMEISOU ANE PITA**

## **MUKAUKAVU MULAI NOXI'A TA MITEMA NOXOU LATAUA**

### **Vaikala lamana**

Uoli voloxu ta tameisou noxou Pita 'o ne, mukaukavunu mulai noxi'a ta mitema e mixali ta mitema noxou Kalisito tatei. Anu mukaukavu mulai noxi'a xo ta tisa kalakalavoi mose'i i'oxo loloxa'a no anu lavulavu kalakalavoi la u'oxonu muxamuxaxu tane'i noxi'a utaloxo xe u'oxone'i la imulinu 'ili'ilixo lailaixe la uasi. Mo muvikalane'i lexe itetelisou vaikala noxi'a ta aposeli e milosi'a pekia'u. No anu vote'i ane ne la sou ane'i imomomo sou ilavusou Lataua xe Tila Iesu Kalisito maninasou. Xo ane'i ta aposeli ne mimaisou Iesu no ie'i xe milomusou lapuloto noxou.

Ta mitema mose'i mivikala lexe Iesu umomomo sou ulivu une'e la uasi. La sou anu muvikalane'i lexe Iesu ne ulivu une'e manina. Ia Anu ulive une'e palea uasi ne, xo Lataua "umasaxa lexe itema vile uluua uasi, ia Anu mumasaxa lexe ta mitema ukalusi ixiunu opone'i la sou Anu uxolu se'isisi sou uxomaie'i" (3:9).

### **A'alo muai no nano aloxo 'o**

Vaikala lamana 1:1-2

Sosovo xe 'ava noxou Lataua 1:3-21

Ta tisa kalakalavoi 2:1-22

Voxo noxou Tila 3:1-16

Nenge tasaxila'inge mo taxomaiou Tila 3:17-18

---

**1** <sup>1</sup> Eni Saimoni Pita itema sou xaixai noxou Iesu Kalisito mo eni Aposeli, ekaukavunu vaivaikala ane 'o mo esovanu mulai noxi'a ane'i ane no anu 'ili'ilixo mulapu noxou Lataua noxinge mo Anu itema sou pamauli Iesu Kalisito mulosie'i la sou ane'i mimuxaxu tane'i kalumo

iouvilesisi laixe aloxo nexi 'o. <sup>2</sup> Xo ngingi ngelavusou Lataua mo Iesu anu Tila noxinge, la sou eni akilaka lexe alauna mo opo se'isisi noxou u'ana'ana noxinge manina.

### **Lataua Musosovosinge Mo Mu'avalinge**

<sup>3</sup> Aloxo nenge telavusou lexe Tila Iesu anu Lataua e no anu uala tila Anu muno'u mo 'ili'ilixo lailaxe noxou Anu mu'avalinge, la no anu xavi noxou mo Anu mulosinge mimii tavu'alo nenge temasaxau sou usu'ulinu maulinenge mo tamuamua'i no anu 'ili'ilixo noxou Lataua. <sup>4</sup> No anu 'ili'ilixo ne la sou Anu ulosinge mimii ta tatila xe lailaixe ane Anu musakiinu vaivaikalasou tei lexe ulosinge, la sou no anu mimii e Anu ulosinge ne, usu'ulingengi sou ngamulinu 'ilixo noxou Lataua, mo usu'ulingengi la ngaxolu va'axu no anu 'ilixo masumasua noxi'a ta mitema e imulinu masaxa masumasua sou vasime'a iulua mo ino'u navunavu. <sup>5</sup> Xe tava'u aloxo ne, la sou ngatovonu xavingengi sou ngamuxaxu tangengi manina sou menexu 'ilixo lailaixe ne, la sou ngingi ngalavusou Lataua. <sup>6</sup> <sup>a</sup>Mo lexe ngingi ngalavusou Lataua la sou ngingi ngamomomo sou ngamulinu masaxa sou vasimenge uasi, mo lexe ngingi ngamulinu masaxa sou vasimenge uasi, la ngingi ngamomomo sou ngatulu pekia'inge no voxo sou tu'utu'umaxu uxalisinge, mo lexe ngingi ngamomomo sou ngatulu pekia'inge la sou ngamuamua'i no anu 'ili'ilixo noxou Lataua, <sup>7</sup>mo lexe ngamuamua'i no anu 'ili'ilixo noxou Lataua la sou ngingi tangengixa'a ta vivinge ngatongato'o, xe lexe ngingi tangengixa'a ta vivinge ngatongato'o la tangengixa'a no nano no tanengi maninasou. <sup>8</sup> Xo lexe 'ili'ilixo ane ne uxolu no nano no anu maulingenge la anu uleme mo uxali tatila, la ngingi ngalavusou Tila noxinge Iesu Kalisito la ngingi ngaxali loxo mii vitanisi mo unene'a mo ngiangiaxu uasi, uasi. <sup>9</sup> La lexe 'ei ane 'ili'ilixo ane ne uxolu no anu maulixu uasi la anu loxo itema iou seleveenu mo umalei ulai no paxa uasi, anu ulavusou lexe 'ili'ilixo masumasua e anu mu'oxonu tei 'olele ne Lataua uxexee uasi. <sup>10</sup> La sou ta vivilo, ngatovonu xavingengi manina mo nga'oxonu 'ava mo sosovo noxou Lataua noxinge uxali maninasou. Xo lexe ngingi nga'oxonu aloxo ne, la mivile umomomo sou utaloxolingenge uasi manina. <sup>11</sup> Lexe ngingi ngamulinu vote'i ane ne la aitenga ukisi noxinge la ngingi nga'unalai no tuala saxisaxila'u noxou Tila noxinge mo itema sou pamauli Iesu Kalisito teitexi no opo loxotolo e kaluxu uasi.

### **Palomatana sou Vaikala Noxou Lataua**

<sup>12</sup> La sou ngingi ngalavusou mimii ane ne mo ngatulu pekia'inge no anu vaikala manina ane ngingi ngeno'u vaimomo, ia eni amomomo

<sup>a</sup> 1:6 Xal 5:22-23

sou axiu tumaliloinge uasi mo aavuavutilixu xavutalamengi utotomu no anu mimii ne.<sup>13</sup> Eni axavutala lexe anu laixe sou eni aavuavutilixu xavutalamengi no mine eni uao axoxolu loxo tani alelaxu noxou Lataua.<sup>14</sup><sup>b</sup> Xo aloxo Tila noxinge Iesu Kalisito muvikalaleli lamana mo eni elavusou lexe sexasisi sou tasaxanu vasimelo ulai no lia.<sup>15</sup> Mo eni atovo xavileli manina sou aavuavutilixu xavutalamengi utotomu mo sou ili'i no anu soli noxilo la ngingi umomomo sou ngaxavutalanu mimii ne.

<sup>16</sup><sup>c</sup> Nexi taa'alomengi no anu a'losou lailivuxu Tila noxinge Iesu Kalisito mo xavi noxou 'o ne, xo nexi temaisou manina no iexi, ia loxo tamulinu a'alo vitanisi mo xavutala noxi'a ta mitema uasi.<sup>17-18</sup><sup>d</sup> Xo no mine nexi noxou Iesu texolu teitexi no alaele tavuna, la nexi temaisou Lataua anu Momu mutoxonu mo mulosou uala tila. Mo nexisisi telomusou xolinu Lataua mulaa no anu lamanaxu e xaviinu musuku ne molu teitexi no opo loxotolo muvikala aloxo 'o,

“Anu 'alixeni ane, e eni talelixu misevile mo opoleli u'osasou misevile.”

<sup>19</sup> La sou nexi temaisou mo telavusou manina lexe vaivaikala noxi'a ta mitema sou palomatana ne anu muxali sou, la sou anu laixe lexe ngingi kalumo ngamuxaxu no tangengi, xo anu Iesu loxo telu ukaakaa no isivoxo mo ulai utalo no mine lamana ukea loxo xuae sou lamana ukaa no nano no opongengi.<sup>e</sup> <sup>20</sup> Mo mii mutila lexe ngingi ngalavusou ne aloxo 'o, vaivaikala noxi'a ta mitema sou palomatana e mikaukavunu muai no nano no anu Lavuku Tavuna noxou Lataua ne i'oxonu no anu xavutalai'asi uasi.<sup>21</sup><sup>f</sup> Xo vaivaikala noxou Lataua uxali no anu masaxa noxou itema vile uasisi manina. Ia Lataua anusisi molu ulosi'a ta mitema sou palomatana vaivaikala la sou ane'i ivivikala no anu xavi Uleenu Tavuna.

### Ta Mitema sou Illosieixa'a Lavulavu Kalakalavoi

**2** <sup>18</sup>Ia, tatei la ta mitema sou palomatana kalakalavoi mixolu no taine'i ta Isilaeli. La sou anu iouvilesisi aloxo ta mitema sou ilosinge lavulavu kalakalavoi kalumo ixolu no taingengi. Ane'i itoke i'una la ilosiengi lavulavu kalakalavoi la ixovulaululinenge mo ngapolo vaaxu. La ane'i mixiunu tumali'a noxou Tila noxi'a e multone'i milivu. Ane'i mi'oxonu aloxo ne, ia sexasisi sou iuluamulinu.<sup>2</sup> No anu kalakalavoi noxi'a ne, la ta mitema tavu'alo imulinu 'ilixo masumasua no anu masaxa masumasua sou vasime'a sou imaela no anu, la sou u'oxone'i ta mitema la ivikala masumasua no anu vote'i manina sou.<sup>3</sup> Xo no anu masaxa

<sup>b</sup> 1:14 Ioa 21:18-19; 2Ko 5:1   <sup>c</sup> 1:16 Mat 17:1-5   <sup>d</sup> 1:17-18 Mat 17:5   <sup>e</sup> 1:19 Ulai utalo no mine lamana ukea ne anu voxo sou ta mitema itulu no anu vaivaikala.   <sup>f</sup> 1:21 2Ti 3:16; 1Pi 1:11-12   <sup>g</sup> 2:1 Mat 24:11; Iud 4

noxi'a ta mitema sou ilosinge lavulavu kalakalavoi ne iisuxu mimii tavu'alo la i'oxo vaivaikala kalakalavoi mose'i no anu xavatalai'asi sou i'oxo lolongenge la ino'u lamolimengi. Xo Lataua e Anu utulusi'a no anu vaivaikala mo u'oxo masuane'i muloo tatei mo sou ukalusi'a ne uai uasi anu 'a uxoxolu.

<sup>4</sup><sup>h</sup>Xe ngingi ngelavusou lexe ta angelo mi'oxonu susu la Lataua utatalosi'a uasi, ia mupeine'i mulu'elai no taxa e isivoxo toxoxa'a mo tuala sou navunavu sou ixomaiou voxo sou itulu no anu vaivaikala. <sup>5</sup><sup>i</sup>Xo ta mitema tatei mi'oxo susu la Anu utatalosi'a uasi, Anu mu'oxonu alipaa toxoxa'a la mukalus'i'a ta mitema e imulinu 'ili'ilixo noxou Lataua uasi. Ia Anu musaxila'u Noa anusisi itema sou a'alo no anu 'ili'ilixo mulapu noxou Lataua ilo'a ta mitema muxatele ta tameisi mimauli. <sup>6</sup><sup>j</sup>Mo anu mu'oxonu masuanu sou mu'elaxu tuala tatila tamei ne Sodomu xe ne Xomola la muxali lomulosi. Anu mu'oxonu aloxo ne sou mumaxa'u mii ma'ia ane sou uxali ili'i no 'a maulixa'a ta mitema e imulinu 'ili'ilixo lailaixe noxou Lataua uasi. <sup>7-8</sup><sup>k</sup>Mo Loti anusisi Lataua mu'umenu xo anu muxolu no taine'i ta mitema e i'oxonu 'ili'ilixo masumasua manina. No voxovoxo utotomu la anu mulolomusi'a xe mumaisi'a mi'oxo'oxonu 'ili'ilixo ne la tanu mutamasi'a manina, xo ane'i imulinu 'ili'ilixo mulapu uasi. <sup>9</sup>Anu aloxo ne la sou ta mitema e imulimulinu 'ili'ilixo lailaixe noxou Lataua, tovotovo uxalisi'a la Tila mulavusou vote'i anevaa sou u'umene'i, la usolonu sou ulosi'a navunavu ane'i ane imulinu 'ili'ilixo mulapu uasi ulai utalo no voxo ane sou ane'i itulu no anu vaivaikala. <sup>10</sup><sup>l</sup>Mii ane 'o ne uxali manina noxi'a ane'i ane xavatalai'a uavuti sou imulinu masaxa masua sou vasime'a la mixiu tumaliau vaikala noxi'a ta tatalasi'a. Ta mitema ne mi'oxonu tilasi'a la i'ume uasi la mivikala masua noxi'a ane'i ane ta lailaixe ixoxolu teitexi. <sup>11</sup><sup>m</sup>La sou ane'i ta angelo e ixoxolu teitexi ne xavine'i musuku muaulixa'a ta mitema ne, ia ilavusou i'otosou anaxa'a no iou Tila uasi. <sup>12</sup><sup>n</sup>Xo ta mitema ne ane'i aloxo ta mimii e Lataua mukoine'i mixolu no lia 'o imulimulinu masaxa sou vasime'asi, ia ilavusou ixavutala uasi mo ane'i loxo ta mimii e mixali mixolu no lia 'o sou ta mitema ive'ave'a la isoisolisi. Ia ta mitema ne ivikala masua no anu mii ma'ia e ane'i ilavusou uasi. Ane'i iulua kalumo aloxo ta mimii e Lataua mukoine'i.

<sup>13</sup>Ane'i ino'u lakolisou navunavu ma'ia ane ane'i mi'oxonu mulai noxi'a ta mitema. Mo ane'i ixavutala lexe no anu 'iliixo sou ngingi ngongi'a nga'ani ngapita la anu mauli ane. Ane'i i'oxonu mimii no aso uieiei sou umomomo sou masaxa sou vasime'a, xe ane'i i'oxonu aloxo ne la imaa nunisinge mo ipamaelangengi no anu 'iliixo masumasua noxi'a. <sup>14</sup>Ane'i

<sup>h</sup> 2:4 Iud 6   <sup>i</sup> 2:5 Tav 6–8; 2Pi 3:6   <sup>j</sup> 2:6 Tav 19:24; Iud 7   <sup>k</sup> 2:7-8 Tav 19:1-16   <sup>l</sup> 2:10 Iud 7-8, 16   <sup>m</sup> 2:11 Iud 9   <sup>n</sup> 2:12 Iud 10

masaxa lexe imuline'i ta sema sou vote'isi mo masaxa tatila noxi'a sou i'oxonu 'ili'ilixo sou vote'i ia i'oxonu aloxo ne la ukalusou masaxa noxi'a uasi, sisixa'a sio. Mo ane'i ilapune'i ta mitema e xavutalai'a pekia'u uasi la i'oxonu 'ili'ilixo ne kalumo. Mo ane'i milavu manina no anu 'ilixo sou isuisu. Ane'i mi'oxonu aloxo ne la ane'i mixolu no laaxu tu'utu'umaxu noxou Lataua. <sup>15</sup><sup>a</sup>Ane'i mi'oxonu aloxo ne, la imulinu vote'i noxou laixe uasi mipolopepeenu mo milai va'axu, mimulinu vote'i noxou Balamu anu Beori 'olu. Anu mumasaxau lamoli la mu'oxonu susu. <sup>16</sup><sup>b</sup>Ia Lataua la'iaxu xo anu mu'oxonu susu sou umasaxau lamoli noxou tatananu tuala la sou donki anu mii vile ulavusou uvivikala uasi ne, muxiunu xolinu loxo itema mo mutualuxu xavutala noxou itema sou palomatana ne no anu susu noxou.

<sup>17</sup><sup>c</sup>Ta mitema ne ane'i aloxo pupulu e lexa no anu uasi mo aloxo tamuxalaxu uali e la'avexu uali une'e la utavulenu ulai. Ane'i ta mitema ne Lataua mulalaxiinu tualasi'a sou ilai ixolu no anu ne isivoxo manina mo kaluxu uasi. <sup>18</sup>Ane'i ipulipulinu anaxa'a vitanisi mo itooxa'a no anu susu noxi'a ne. Mo i'oxonu 'ilixo masua no anu masaxa masua sou vasime'a sou itovo ilapune'i ta mitema ane itovo i'ume noxi'a ta mitema e imulimulinu vote'i mukilikalu ne. <sup>19</sup>Mo ane'i ivikalane'i ta mitema lexe imuline'i la ane'i ilulusi'a, ia ane'i ta mitema ne susu musakisakine'i la ilulu uasi. Ane'i mixali loxo itema sou xaixai vitanisi, xo loxo itema vile umulaxu mii vile uuli no anu maulixu la anu uxali loxo itema sou ipalupalusou no anu mii ne. <sup>20</sup><sup>d</sup>Xo no anu lavulavu noxi'a noxou Tila noxinge mo itema sou pamauli Iesu Kalisito, la ta mitema mi'ume no anu 'ili'ilixo masumasua noxi'a ta mitema e sou i'oxonu masuane'i. Xe ili'i la ane'i milivuu 'ili'ilixo ne la mixali masua avile, xo tei la anu masua ia ane 'o la anu masua a vile. <sup>21</sup><sup>e</sup>La sou anu laixe lexe mamu sou ane'i ino'u lavulavu no anu vote'i sou 'ilixo mulapu ne. Xo ane'i milavusou xe mukalu la mixiunu tumali'a no anu lapuloto noxou Lataua e Anu molu mulosie'ixu. <sup>22</sup><sup>f</sup>La sou ane'i mi'oxonu aloxo ne la anu mumomomo sou vaikala vile sou peletotosinge aloxo 'o, "A'aa uexi xe ukalu la ulivu ulai u'ou la." Mo aloxo, "Memee u'ulo no lexa xe ukalu la ulai umalinga no pita la."

### Voxo sou Tila Ulivu Une'e

**3** <sup>1</sup>Ta menexilo e eni amasaxaine misevile, kaukavu ta tamei sou 'o eni akaukavunu ulai noxinge la. No nano no anu kaukavu ta tamei la anu vaivaikala sou aavuavutilixu xavutalamengi mo u'oxongengi sou ngaxavutalanu vaivaikala ane laixesi. <sup>2</sup><sup>g</sup>Eni amasaxa lexe ngingi

<sup>a</sup> 2:15 Iti 22:7; Iud 11; Pal 2:14   <sup>b</sup> 2:16 Iti 22:28-35   <sup>c</sup> 2:17 Iud 12-13   <sup>d</sup> 2:20 Mat 12:45

<sup>e</sup> 2:21 Luk 12:47-48   <sup>f</sup> 2:22 Xav 26:11   <sup>g</sup> 3:2 Iud 17

ngaxavutalanu vaivaikala noxi'a ta mitema sou palomatana noxou Lataua tatei mo lapuloto noxou Tila noxing mo itema sou pamauli e ta aposeli noxou Lataua mia'alomengixu. <sup>3</sup><sup>v</sup>Mii mutila laixe lexe ngingi ngalavusou tei aloxo 'o, no anu voxo kalukaluxu sou la ta mitema e imulimulinu masaxa masua sou vasime'a imolovila'isou lalotu noxing. <sup>4</sup><sup>w</sup>La ane'i ivikala imolovila'i lexe, "Anu musakiinu vaikala tei lexe Kalisito ulivu une'e, la ava'a? Ta 'ilusulusunenge misoisoli mukalu no musoko no mine Lataua musokou mimii mune'e muxali vaimomo 'o la mimii uxiu uasi a uxolu no tanixu 'o si." <sup>5</sup><sup>x</sup>Ia ane'i ixavutala laixe uasi tane'i vulusi lexe tatei manina no mine Lataua musokou sou mukoinu mimii la mukoinu loxotolo mo lia muxali muatu no anu lexa. Mimii ne anu mukoinu muxali no anu vaikalasi. <sup>6</sup><sup>y</sup>Mo no anu lexa ne kalumo la anipaa toxoxa'a mukalus'i ta mitema no lia 'o tatei. <sup>7</sup>Ia loxotolo ilou lia e uxoxolu vaimomo 'o ne imulinu vaikala noxou Lataua, mo ixolu iloo sou navu uasi. Ane'i ixoxolu aloxo ne ulai utalo no anu voxo ane Lataua utulusi'a ta mitema e imulinu 'ili'ilixo noxou Lataua uasi itulu no anu vaivaikala mo iulua.

<sup>8</sup><sup>z</sup>La sou ta menexilo e eni amasaxainge misevile, mamu sou tangengi vulusiou mii ane 'o aloxo 'o. Voxo vile noxou Tila ne anu aloxo tauu ie itemaxu mavulovexa ta'uve (1,000) mo tauu ie itemaxu mavulovexa ta'uve (1,000) ne aloxo voxo vilesisi. <sup>9</sup><sup>a</sup>Mo ta mitema mose'i milavusou lexe Tila u'oxoo se'isisi sou u'oxonu mimii uxali loxo anu musakiinu vaikala sou tatei. Ia aloxo ne uasi, anu uxolu se'isisi mo uxomaiengi, xo umasaxa lexe itema vile noxingue uulua uasi. Anu umasaxa lexe ta mitema latala ixiunu opone'i ukalusi

### Loxotolo Alavua Mo Lia Alavua.

<sup>10</sup><sup>b</sup>Tila uxolu se'isisi mo uxomaiengi ia voxo sou Tila ulivu une'e ne aloxo itema sou pakali. Mo no voxo ane ne la loxotolo upau la luluxu tatila loxo lele'e xe alaxu vilesisi la tasiauxu avile mo ta mimii iouiou mixolu teitexi no loxotolo mo no lia 'o mo lia ilou xaixai iouiou e ta mitema i'oxo'oxonu no lia 'o ne umamulo mo u'ela ukalusi. <sup>11</sup>Ioxe lexe no anu vote'i anenesi la mimii latala ne ukalu, la sou ngingi ngamauli a loxovaa? Lexe ngingi ngamasaxa lexe ngamauli la, ngaxolu va'axu no anu 'ili'ilixo masumasua mo ngamulinu 'ili'ilixo noxou Lataua. <sup>12</sup>Mo ngingi ngaxolu ngaloloopalasi lexe voxo noxou Lataua ne uvoovoxo uasi uxali upasipaasi. Ia no anu voxo ane ne la loxotolo u'ela ukalusi mo ta mimii iouiou mixolu no anu mo ta mimii ane mixolu no lia 'o kalumo ne navu uieine'i la isiali vitanisi. <sup>13</sup><sup>c</sup>Mo sou nenge taxolu taloloopalasi no anu mii ma'ia e Anu musakiinu vaikala sou tatei. Anu ane loxotolo alavua mo lia alavua mo 'ili'ilixo mulapusi u'ana'ana no anu.

---

<sup>v</sup> 3:3 1Ti 4:1; Iud 18   <sup>w</sup> 3:4 Mat 24:48   <sup>x</sup> 3:5 Tav 1:6-9   <sup>y</sup> 3:6 Tav 7:11; 2Pi 2:5   <sup>z</sup> 3:8 Lex 90:4   <sup>a</sup> 3:9 Ava 2:3; 1Ti 2:4   <sup>b</sup> 3:10 Mat 24:29, 35; Luk 12:39; 1Te 5:2   <sup>c</sup> 3:13 Ais 65:17; 66:22; Pal 21:1, 27

<sup>14</sup> La sou ta menexilo e eni amasaxainge misevile, lexe ngingi ngaxoxolu sou ngaxomaiou voxo ne uxali la ngatovonu xavingengi manina sou nga'oxonu susu vile mo ixalisou susu vile mo vuvuli vile uxolu noxinge uasi. Ngingi nga'oxonu aloxo ne xe no mine Anu une'e la opongengi uai se'isisi xo ngingi ngongi'a ngaxolu. <sup>15<sup>d</sup></sup>Nenge'a talavusou laixe lexe Tila anu uxolu se'isisi mo uxoxomaienye ne xo Anu umasaxa lexe nenge latala tamauli ukalusi. Aloxo vivinge nenge'a Paulo e nenge temasaxau misevile, Lataua mulosou lavulavu la Anu mukaukavu mulai noxinge la mulelemolu kalumo. <sup>16</sup>No anu kaukavu noxou mukalusi ne la Anu muvivikala no anu mimii iouvilesisi ane. Mo no nano no anu kaukavu noxou ne la Anu muvivikala no anu mimii mose'i pekia'u sou nenge talavusou. La sou ta mitema mose'i ilavusou uasi mo xavutalai'a pekia'u uasi, itovo lexe ilulusou laaxu la ikalakalavoi no anu. Ane'i mi'oxonu no anu a'alo mose'i muai no nano no anu Lavuku Tavuna noxou Lataua kalumo. Ane'i mi'oxonu aloxo ne la iuluasi. <sup>17<sup>e</sup></sup>Aloxo ne la sou ta menexilo e eni amasaxainge misevile, ngingi ngelavusou mimii ne, la sou ngasaxila'inge laixe. Loxo 'o io ngamulinu 'ili'ilixo noxi'a ta mitema e imulinu lapuloto noxou Lataua uasi la u'oxongengi ngalai va'axu. Ngingi nga'oxonu aloxo ne mamu, xo ngingi nga'oxonu aloxo ne la u'oxongengi ngalapau no anu muxamuxaxu tangengi. <sup>18</sup>La ngingi ngaleme no nano no anu alauna mo lavulavu noxinge noxou Tila noxinge mo itema sou pamauli Iesu Kalisito. Eni akilaka lexe ta'itinu Tila noxinge ualasou vaimomo 'o mo utotomu mo kaluxu uasi. Manina.

<sup>d</sup> 3:15 Rom 2:4    <sup>e</sup> 3:17 Mak 13:33; 1Ko 10:12